



9. marts 2012

FM2012/71

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Isorliunerusuni imigassanik kimittuuneq pisinissamut inerteqquteqarneq pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Justus Hansen, Demokraatit)

Tunngavilersuut

2008-p aasaanerani taamani Naalakkersuisuusut aalajangerput nalunaarusiorniartutik (*Ammassalik kommuneani imigassanik aalakoornartulinnik nioqquteqartannginnissaq aamma imigassanik 15% sinnerlugu aalakoornartortalinnik sassaallertoqartannginnissaa pillugu Namminersornerullutik Oqartussat nalunaarutaat nr. 20, 30. juni 2008-imeersoq*) Tunumi tamarmi imigassamik nioqquteqartarnerup inerteqqutaalernissaa pillugu.

Ukiup siuliani – 2007-p aasaanera – aamma Qaanaami inerteqqut assigusoq atuutsinneqalerpoq (*Qaanaap kommuneani imigassanik aalakoornartulinnik nioqquteqartannginnissaq aamma imigassanik 15% sinnerlugu aalakoornartortalinnik sassaallertoqartannginnissaa pillugu Namminersornerullutik Oqartussat nalunaarutaat nr. 11, 20. jui 2007-imeersoq*)

Naalakkersuisut uannut akissuteqarnerminni oqaatigaat, sumiiffinni pineqartuni inerteqquteqarnerup atorunnaarsinneqarnissaat pilersaarutaanngitsaq. Akissuteqartuuvoq Peqqinnermut Naalakkersuisoq ulloq 7. februar 2011 aamma Naalakkersuisut taamanikkulli oqaatiginikuunngilaat isumartik allanngortilernerlugu.

Demokraatini isumaqarpugut, inerteqquteqarnerit oqallisigineqarnissaat pisariaqalersaq. Qularutissaanngilarmi, assigiinngisitsineq matumani pineqarmat. Naalakkersuisut piaarinatik aalajangiussimavaat, innuttaasut ilaat imigassarsisinnaassasut, allallu imigassarseqqusaassanngitsut. Aalajangiinermi tunngavituaavoq, sumi najugaqarusunnerluni aalajangersimaneq. Eqqartorneqanngilaq, assersuutigalugu persuttaasartut imigassarseqqusaassanngitsut – pineqarporli inuit naliginnaasut inatsisit naapertorlugit inuusut imigassarseqqusaassanngitsut nunap ilaani sumiiffimmi aalajangersimasumi najugaqarumallutik aalajangersimanagerat pissutiginnarlugu.

Inuiaqatigiit taamaattut ilumut kissaatigaangut? Inuiaqatigiit, immikkoortitsisut sumi najugaqar-neq pissutiginnarlugu. Inuiaqatigiit taamaattut uanga kissaatiginngilakka.

Taamatulli oqareerlunga erseqqissassavara imigassaq kimilluunniit peqqinnartuunngimmat. Suallummik imigassaq kimittoq. Akulikittumik aamma imaappoq, imigassaq pissutaasarluni persuttaattoqarsimatillugu imaluunniit ajornermik pisoqarsimatillugu. Imigassamik atornerluineq me-

eqqanik sumiginnaanermik kinguneqartarpoq allanillu asasanik. Taamaakkaluatorli amerlanerpaat imigassartorsinnaapput perullulioqinatik. Tamanna nuannaarutissaavoq, tamannalumi pisutaagunarpoq nunatsinni imigassap nioqutaasinnaaneranut.

Inuiaqatigiinni ikinnerussuteqartut kisimik aqussinajunnaartarput imigassartorsimatillutik taamaattumik naapertuuttuliornerunngilaq taakku ikittuinnaat aqussappassuk, suut inerteqqaataassanersut suullu inerteqqaataassannginersut. Qularinngilara Nuummi amerlanerussuteqarluartut ajornartorsiutigissagaat imigassarsisinnaaneq inerteqqaataagalarpat imaluunniit sassaalliisinnaaneq. Aamaassaaq naak sapaatip akunneranut politiit nalunaarusiarisartagaasa paatsuugassaangitsumik takutittaraluaat, pisunut amerlasoorpassuarnut imigassartorsimaneq pissutaasartoq. Taakku qavannut ilanngunneqassapput pisartorpassuit politiinut nalunaarutigineqarneq ajortut. Nuummi imigassaq matuneqaralarpat allatut oqaatigalugu qularutissaangitsumik persuttaasernerit assigisaallu ikileriarujussuassagalarput. Taamaakkaluartoq Nuummiut arlaannaataluunniit nipituuliutigineq ajorpaa imigassap matuneqarnissaa.

Kisianni taava sooruna Tunumi Qaanaamilu allaanerusariaqartoq ? Akissut oqinnerpaaq tassaasariaqaralarpoq soorunami taamaattoqassangitsoq. Piviusorli killormoorpoq. Inuiaqatigiit piaarinatik innuttaasunik immikkoortitsipput.

Demokraatini isumaqarpugut pisariaqalersoq assigiinnerusumik pinninnissaq. Kalaallit amerlanerpaartaat eqqissisimasumik imigassamik atueriaaseqarpugut – apeqqaatanani sumi najugaqarnerisugut. Taamaattuminguna pissusissamisuunngitsoq immikkoortitsisoqarnera.

Paarlattuanik piffissaqarfiginerusariaqaralarparput eqqartussallugu inoqatigut imigassamik ajornartorsiutillit qanoq ikiussanerigut aamma meerartagut inuusuttagullu qanoq perorsasserigut imigassamik peqqinnartumik imeriaaseqalersikkumallugit kiisalu torersumik atuisinnaalersikkumallugit. Tassunga atatillugu tulluassagalarpoq imigassap eqqartortarnera meeqqat atuarfianni aallartinneqartartuuppat aamma naapertuuttuliornerussaaq angajoqqaat akuttunngitsumik imigassap ajoqutai ajoqusiisarneralu pillugit qitornatik oqaloqatigisalertuuppatigit.

Immikkoortitsineq inuiaqatigiinni demokratiskiusuni atorsinnaanngilaq aamma ajunnginnerpaamik isumaqarluni immikkoortitsigaluaanniluunniit.

Taamatut oqaaseqarlunga, qilanaarpunga Naalakkersuisut akissutissaannut kiisalu partiit allat saqqummiussassaannut.